



MØTEINNKALLING

Utval: Formannskapet
Møtedato 31.08.2023
Møtetid: Kl. 15:00
Møtestad: Biblioteket på Bjørkheim

Varamedlem skal ikkje møta utan nærare innkalling

Forfall til møtet må meldast snarast råd til servicesenteret (tlf. 56 58 74 00 eller e-post postmottak@samnanger.kommune.no), som vil kalla inn varamedlem.

Me ber om at alle som kan vera ugilde i ei eller fleire saker på sakslista melder frå om dette til servicesenteret.

I starten av møtet blir det ei arbeidsøkt på ca. 1 ½ time med tidlegare innspel/tankar om strategisk næringsplan.

Det blir også ei orientering frå Statens vegvesen, Vestland fylkeskommune og E134 Haukelivegen AS om KVV 134 arm til Bergen.

Knut Harald Frøland
ordfører

SAKLISTE

Saker til handsaming på møtet

Sak nr.	Arkivsak	Sakstittel	Merknad
050/2023	23/714	Godkjenning av innkalling og sakliste	
051/2023	23/714	Faste saker	
052/2023	23/485	Høyringsuttale til NOU 2023:9 Generalistkommunesystemet	
053/2023	20/146	Avtale om administrativ vertskommunesamarbeid mellom Bjørnafjorden kommune og Samnanger kommune om interkommunal legevakt og legevaktsentral	
054/2023	23/630	Søknad om økonomisk støtte til N.K.S. Veiledningssenter Vest	
055/2023	19/303	Tilslutning av nye deltakarkommunar til Bergen og Omland Friluftsråd	
056/2023	21/789	Søknad frå Lønnebakken Grendelag om ekstra midlar til asfaltering av multibane	
057/2023	22/300	Offentleg ettersyn av detaljregulering for Aldalen akvakulturanlegg i Lønningdal	



SAKSFRAMLEGG

Sakshandsamar: Marianne Soleng	Arkivkode: FE-033
Arkivsaksnr: 23/714	Løpenr: 23/8398
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	31.08.2023	050/2023

Godkjenning av innkalling og sakliste

Rådmannen sitt framlegg til vedtak:

- Innkalling og sakliste vert godkjent.



SAKSFRAMLEGG

Sakshandsamar: Marianne Soleng	Arkivkode: FE-033
Arkivsaksnr: 23/714	Løpenr: 23/8399
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	31.08.2023	051/2023

Faste saker

Rådmannen sitt framlegg til vedtak:

- Orienterings-/referatsaker vert tekne til orientering.

Oversikt over faste saker:

Eventuelle merknader til protokoll frå førre møte.

Orienterings-/referatsaker.

Spørsmål.



SAKSFRAMLEGG

Sakshandsamar: Jan Erik Boge	Arkivkode: FE-00, TI-&13
Arkivsaksnr: 23/485	Løpenr: 23/7241
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	31.08.2023	052/2023
Kommunestyret		

Høyringsuttale til NOU 2023:9 Generalistkommunesystemet

Rådmannen sitt framlegg til vedtak:

Saka blir lagt fram utan tilråding frå rådmannen.

Dokument som ikkje er vedlagt:

- NOU 2023:9 Generalistkommunesystemet. Likt ansvar – ulike forutsetninger (<https://www.regjeringen.no/no/dokumenter/horing-generalistkommunesystemet/id2972587/>)
- Delegeringsreglement for Samnanger kommune (<https://www.samnanger.kommune.no/reglement-vedtekter-planar/>)

Oppsummering:

Generalistkommuneutvalet vart oppnemnt i november 2020. Utvalet leverte i mars 2023 utgreiinga si (NOU 2023:9) til Kommunal- og distriktsdepartementet. Departementet sende i april 2023 utgreiinga ut på høyring, med høyringsfrist 01.10.2023. Samnanger kommune v/kommunestyret kan gje høyringsuttale.

Saksopplysningar:

Bakgrunn for saka:

Generalistkommuneutvalet sitt oppdrag var å skaffa eit heilskapleg kunnskapsgrunnlag om det norske generalistkommunesystemet sin verkemåte og utvikling. Utvalet skulle vurdere dagens generalistkommunesystem og kva føresetnader og rammer kommunane har for å vera generalistkommunar i dagens og framtidens velferdssamfunn. Utvalet skulle òg vurdere alternativ til dagens system. Det går fram i NOU 2023:9 korleis utvalet har løyst oppdraget sitt, og kva anbefalingar utvalet har. Kommunal- og distriktsdepartementet ønskjer at berørte og interesserte aktørar (mellom anna kommunane) vurderer generalistkommuneutvalet sine anbefalingar og kjem

med høyringsuttalar.

I punkt 1.1 i NOU 2023:9 har utvalet forklart korleis dei forstår nokre sentrale omgrep i saka og kva dei har lagt til grunn for arbeidet sitt. Desse forklaringane, som er refererte nedanfor, kan vera nyttige for å avklara kva ein meiner med generalistkommune m.m.

- **Generalistkommuneprinsippet:** inneber at alle norske kommunar har same juridiske status og det same ansvaret for dei lovfesta oppgåvene, uavhengig av innbyggartal, busettingsstruktur, økonomi eller andre kjenneteikn.
- **Generalistkommune:** eit eige rettssubjekt der kommunestyret har ansvar for å løysa eit breitt tal offentlege oppgåver innanfor sitt territorium.
- **Generalistkommunesystemet:** eit einheitleg nasjonalt styringssystem for generalistkommunar basert på generalistkommuneprinsippet.

Utvalet peikar i NOU 2023:9 på at det er eit aukande press på generalistkommunesystemet, og at kommunane har ulike føresetnader for å handtera utfordringane dei står overfor. Likevel anbefaler utvalet at generalistkommunesystemet blir vidareført. Utvalet kjem i samband med dette med anbefalingar til tiltak for å løysa utfordringane i generalistkommunesystemet.

Vedtaksmynde i saka:

Det går fram av punkt 4.3 i Samnanger kommune sitt delegeringsreglement at mynde til å gje uttale i alle prinsipielle saker ligg til kommunestyret. Det er òg kommunestyret som skal gje uttale i andre saker det er naturleg at kommunestyret uttalar seg. I denne saka vil det etter rådmannen si vurdering vera kommunestyret som har mynde til å gje uttale.

Faktagrunnlag, problemskildring og moglege løysingar:

Fram til 1950-talet var det eit skilje i oppgåver og ansvar mellom by- og landkommunar i Noreg, men dette skiljet vart fjerna i den nye kommunelova som kom i 1955. Ulike særlover som hadde skilje mellom by og land, vart etter dette òg endra etter kvart. Noreg har no i mange år hatt eit generalistkommunesystem, basert på eit generalistkommuneprinsipp der alle kommunane har det same ansvaret.

Det er i dag 356 kommunar i Noreg. Talet på kommunar har etter 1955 i hovudsak vorte redusert gjennom to store strukturreformer, i høvesvis 1968 og 2020. I 1955 vart det 744 kommunar i Noreg. I 1968 var dette redusert til 451, og i 2020 til 356. Sjølv om alle kommunane har det same ansvaret, er det stor skilnad mellom kommunane – mellom anna når det gjeld folketal, areal, økonomi og såkalla sentralitet.

Generalistkommuneutvalet viser i NOU 2023:9 til at alle norske kommunar har følgjande fire hovudoppgåver eller roller:

1. Tenesteytar
2. Samfunnsutviklar
3. Myndigheitsutøvar
4. Lokaldemokratisk aktør og arena

Utviklingstrekk, noverande og framtidige utfordringar m.m. knytt til desse fire hovudoppgåvene (rollene) blir gått gjennom i NOU 2023:9.

NOU 2023:9 er delt i tre hovuddelar:

- I. Det norske kommunesystemet

- II. Generalistkommunane i dag og utviklingstrekk framover
- III. Tiltak for å løysa utfordringar i generalistkommunesystemet

Nedanfor følgjer eit kort samandrag av desse tre hovuddelane.

Del I. Det norske kommunesystemet

I denne delen beskriv utvalet utviklinga av det lokale sjølvstyret i Noreg og framveksten av generalistkommunesystemet. Dei beskriv òg rammevilkåra for generalistkommunesystemet.

Del II. Generalistkommunane i dag og utviklingstrekk framover

Denne delen inneheld ein gjennomgang av korleis dagens generalistkommunesystem fungerer, av utviklingstrekk og av utvalet si vurdering av dagens situasjon. Utvalet si vurdering er at generalistkommunane fungerer bra, men at det er utfordringar, at utfordringane vil bli større framover, at det er små distriktskommunar som har dei største utfordringane, men at også store kommunar har utfordringar. Den viktigaste årsaka til utfordringane er mangel på kapasitet og kompetanse. Lovkrav som krev spesialisert kompetanse og tverrfaglegheit er spesielt utfordrande.

Utviklingstrekk som blir nemnde i Del II er mellom anna:

- Demografiske endringar – fleire eldre, auke i samla folketal, fleire vil bu i store og sentrale kommunar
- Endringar i kommunane sine inntekter – strammare kommuneøkonomi framover?
- Klima- og naturendringar
- Utanforskap aukar
- Press på demokratiet
- Behov for innovasjon, omstilling og digitalisering
- Meir krevjande å sikra tilgang til kapasitet og kompetanse
- Behov for utviklingskapasitet

Del III. Tiltak for å løysa utfordringar i generalistkommunesystemet

I denne delen går utvalet gjennom erfaringar frå andre land i Europa, oppgåvedifferensiering mellom kommunar, erfaringar med kommunesamanslåingar i Noreg, interkommunalt samarbeid, statleg styring, oppgåveflytting og økonomiske og administrative konsekvensar. Denne delen inneheld òg utvalet sine anbefalingar. Utvalet vil oppretthalda generalistkommuneprinsippet og anbefalar ikkje oppgåvedifferensiering mellom kommunane, men meiner det må gjerast tiltak innanfor dagens generalistkommunesystem for å møte framtidens utfordringar.

Generalistkommuneutvalet sine anbefalingar

Utvalet sine anbefalingar går fram av kapittel 1.6 og 14 i NOU 2023:9. Nedanfor følgjer eit samandrag av anbefalingane:

1.	Generelle anbefalingar frå utvalet: · Utvalet anbefalar at generalistkommuneprinsippet blir vidareført. · Utvalet anbefalar ikkje oppgåvedifferensiering mellom kommunar for å løysa utfordringar kommunane står overfor. · Utvalet anbefalar heller ikkje å flytta oppgåver frå kommunane til fylkeskommunane eller staten.
2.	Utvalet meiner det er behov for å gjera fleire tiltak for å løysa utfordringane i dagens generalistkommunesystem: · Større kommunar. Fleirtalet i utvalet meiner større kommunar er det tiltaket som på best måte vil oppretthalda generalistkommuneprinsippet og styrka

generalistkommunane. Fleirtalet i utvalet meiner at større kommunar i dei aller fleste tilfelle vil bidra til å løysa utfordringane med mangel på kapasitet og kompetanse. Fleirtalet meiner det bør førast ein aktiv politikk for å få større kommunar, med vidareføring og styrking av verkemidlar for å oppmuntra og leggja til rette for samanslåingar.

- **Interkommunalt samarbeid.** Utvalet meiner det bør førast ein aktiv politikk for interkommunalt samarbeid.

Utvalet meiner her mellom anna at det er behov for meir omfattande og langsiktig samarbeid i faste konstellasjonar, at det er behov for meir rettleiing knytt til interkommunalt samarbeid, at mange kommunar særleg bør samarbeida meir på planområdet (for eksempel gjennom etablering av interkommunale plankontor), og at det bør vera føreseielege og tilgjengelege økonomiske verkemidlar til å støtta utgreiing og oppstart av interkommunalt samarbeid. Utvalet tilrår ikkje at det blir innført ein særleg lovheimel i kommunelova til å pålegga interkommunalt samarbeid, men at eit pålegg om samarbeid kan vera eit mogleg element i ei særskilt oppfølgingsordning for kommunar med omfattande utfordringar.

- **Redusert statleg detaljstyring.** Utvalet meiner at statleg detaljstyring av kommunane bør reduserast. Utvalet skriv at statleg detaljstyring gir redusert handlingsrom for alle kommunar, og reduserer moglegheiten for prioriteringar basert på lokale behov og politiske ønske, og reduserer moglegheiten for innovative løysingar på utfordringane kommunane står overfor.

Utvalet peikar mellom anna på at lokalt handlingsrom er nødvendig for å kunne tilpassa tenestetilbod og oppgåver til lokale forhold, at bemanningsnormer oftast er ueigna styringsverkemiddel, og at krav til særlege prosessar og rapporteringskrav må avgrensast. Utvalet foreslår at det blir utarbeidd ei oversikt over alle lov- og forskriftskrav til kommunane. Utvalet peikar samstundes på at statleg styring er nødvendig for å ivareta nasjonale omsyn og for å sikra rettar for innbyggjarane i kommunane, og at reduksjon i krava som blir stilt til kommunane ikkje må redusera kommunane sitt ansvar for å ivareta innbyggjarane og nasjonale interesser.

- **Staten bør ta ei meir aktiv rolle som tilretteleggar for at alle kommunar skal kunne ivareta oppgåvene sine.** Dette kan mellom anna vera å bistå kommunane med kunnskap og kompetanse, og samarbeida med kommunane om tiltak for å nå felles mål – for eksempel nasjonal infrastruktur. Utvalet meiner òg at kommunane sine ulike behov og ulike føresetnader må identifiserast og takast betre omsyn til i styring av kommunane.

- **Utgreiing om særskilt oppfølgingsordning for kommunar med store og vedvarande utfordringar.** Fleirtalet i utvalet meiner at ei slik ordning bør utgreiast nærmare.

- **Tilstreккеlege og føreseielege rammer og eit omfordelende inntektssystem.** Utvalet meiner dette er avgjerande for å oppretthalda generalistkommunesystemet også framover.

- **Tydeleggjering av fylkeskommunen si rettleiarrolle.** Utvalet meiner at fylkeskommunen si rettleiarrolle bør tydeleggjerast, og at det bør gjevast meir bistand til kommunane i planlegginga deira, dersom kommunane manglar kapasitet og kompetanse.

- **Hovudansvaret for tilretteleggende samfunnsutvikling og arealplanlegging skal ligga hos kommunane.** Utvalet meiner at fylkeskommunen sine regionale planar i

	større grad bør bygga på kommunale planar. • Opplæring og rettleiing for å styrka kommunane. Utvalet meiner at det må arbeidast vidare med opplæring og rettleiing for å styrka kommunelova sin intensjon og rammevilkåra for god styring og leiing. • Styrka innsats for innovasjon, omstilling, digitalisering og samarbeid med frivillig sektor og andre lokale krefter. Utvalet meiner innsatsen på desse områda må styrkast. • God bustad, utdannings-, nærings- og distriktspolitikk. Utvalet meiner dette er viktig for å leggja til rette for busetting, kompetansebygging og verdiskaping i heile landet. • Særleg statleg status på dei mest perifere og sårbare kommunane i nord. Utvalet meiner det er spesielt viktig at staten har fokus på desse kommunane.
--	--

Uttalar frå andre:

Det er ikkje henta inn uttalar frå andre i arbeidet med denne saka.

Vurderingar og konsekvensar:

NOU 2023:9 er eit stort og omfattande dokument. Det er ikkje mogleg å gå inn på heile innhaldet i dokumentet i denne saksutgreiinga, men rådmannen har i saksutgreiinga prøvd å få med den mest vesentlege informasjonen.

Nokre av anbefalingane til generalistkommuneutvalet vil truleg vera lite omstridde, medan det for andre av anbefalingane i langt større grad vil vera ulike (politiske) syn. For eksempel vil det truleg vera relativt stor politisk semje om at det bør leggjast til rette for meir interkommunalt samarbeid, medan det vil vera ulike politiske syn på om det bør førast ein aktiv politikk for å få større kommunar (kommunesamanslåingar).

Rådmannen si oppfatning er at generalistkommuneutvalet har gjort eit grundig arbeid, og at det i del I og II i NOU 2023:9 er ein god gjennomgang av generalistkommunesystemet – både av historikk, dagens situasjon og utviklingstrekk, samt utfordringar i åra som kjem. I ein eventuell høyringsuttale frå Samnanger kommune bør det ikkje vera nødvendig å kommentera del I (Det norske kommunesystemet) eller del II (Generalistkommunane i dag og utviklingstrekk framover).

Det bør vera aktuelt for Samnanger kommune å kommentera generalistkommuneutvalet sine anbefalingar i del III av NOU 2023:9. Dette kan både gjelda anbefalingar som kommunen støttar og anbefalingar kommunen ikkje støttar. For eksempel kan det vera naturleg at kommunen uttalar seg om anbefalinga om å føra ein aktiv politikk for å få større kommunar (kommunesamanslåingar). Det same gjeld anbefalinga om å vidareføra generalistkommuneprinsippet.

Rådmannen vel å ikkje gje tilråding til vedtak i denne saka. Saka er i stor grad av politisk karakter og det vil vera vanskeleg for rådmannen å gje ei fagleg grunngjeven tilråding til vedtak.

Konklusjon:

Rådmannen si vurdering er at Samnanger kommune truleg bør gje høyringsuttale i denne saka, primært til generalistkommuneutvalet sine anbefalingar i del III av NOU 2023:9. Rådmannen vel å ikkje gje tilråding til vedtak i saka, fordi saka i stor grad er av politisk karakter og det vil vera vanskeleg for rådmannen å gje ei fagleg grunngjeven tilråding til vedtak.



SAKSFRAMLEGG

Sakshandsamar: Edith Oma	Arkivkode: FA-G21
Arkivsaksnr: 20/146	Løpenr: 23/7725
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	31.08.2023	053/2023
Kommunestyret		

Avtale om administrativ vertskommunesamarbeid mellom Bjørnafjorden kommune og Samnanger kommune om interkommunal legevakt og legevaktsentral

Rådmannen sitt framlegg til vedtak:

Samnanger kommune sluttar seg til avtale om administrativt vertskommunesamarbeid mellom Bjørnafjorden kommune og Samnanger kommune om interkommunal legevakt og legevaktsentral. Vertskommunesamarbeidet er heimla etter vertskommunemodellen i kommunelova (LOV-2018-06-22-83) § 20-1 flg., irekna § 20-2 administrativt vertskommunesamarbeid og § 20-4 samarbeidsavtale. Med heimel i kommunelova § 20-2 instruerer kommunestyret rådmannen om å delegera lovheimla oppgåver knytt til tenesteyting av legevakt og legevaktsentral til kommunedirektøren i Bjørnafjorden kommune, innanfor ramma av samarbeidsavtalen.

Dokument som er vedlagt:

Samarbeidsavtale legevakt Samnanger og Bjørnafjorden
Kostnader legevakt Bjørnafjorden 2022
Møte med Samnanger april 2023

Dokument som ikkje er vedlagt:

Tidlegare avtale med Os/Bjørnafjorden kommune

Oppsummering:

Samnanger kommune har sidan hausten 2009 hatt avtale med Os kommune (no Bjørnafjorden kommune) om interkommunal legevakt og legevaktsentral. Forslag frå Os kommune (2019) og Bjørnafjorden kommune (2021) til revidert samarbeidsavtale vart ikkje signert av Samnanger kommune. Samnanger kommune har no fått ny samarbeidsavtale, som er heimla i den nye kommunelova, til signering. Avtalen må godkjennast av kommunestyret.

Saksopplysningar:

Samnanger kommune har sidan 2009 hatt interkommunalt samarbeid med Bjørnafjorden kommune om legevakt og legevaktsentral. Samarbeidsavtalen blei inngått med tidlegare Os kommune og overført til Bjørnafjorden kommune ved kommunesamanslåing mellom Fusa og Os i 2020. I denne avtalen forpliktar Samnanger kommune seg til å stilla med tre legar i legevaktordninga.

Samnanger kommune fekk i desember 2019 tilsendt forslag frå Os kommune til ny avtale. Der vart det foreslått at Samnanger skulle stilla med fire legar i legevaktordninga. Dette var Samnanger kommune ueinig i, fordi kommunen meinte dette kravet ville vera umogleg for kommunen å innfri på grunn av legar som allereie hadde fritak frå å gå legevakt. Forslaget til ny avtale i 2019 vart ikkje signert.

Samnanger kommune fekk i 2021 tilsendt eit nytt forslag til ny avtale, frå Bjørnafjorden kommune. Heller ikkje dette forslaget til avtale vart signert, mellom anna fordi det ikkje gjekk fram av forslaget kva kapittel i den nye kommunelova avtalen og samarbeidet skulle heimlast i. Dette gjorde det vanskeleg for Samnanger å ta stilling til forslaget.

Forslag til ny samarbeidsavtale i 2023

Våren 2022 tok administrasjonen i Samnanger opp igjen kontakten med Bjørnafjorden kommune om avtalen. Det vart då semje om at Bjørnafjorden skulle laga nytt forslag til samarbeidsavtale, som er heimla i den nye kommunelova. I april 2023 fekk Samnanger tilsendt nytt forslag til avtale. Dette forslaget hadde nokre punkt som måtte forhandlast om, blant anna krav om legedekning frå Samnanger og finansieringsnøkkel. Begge desse punkta er det gjennomført forhandlingar om mellom administrasjonane i Bjørnafjorden og Samnanger. Krav om legedekning er no teke vekk. Finansieringsnøkkelen er gjort greie for (forklart) i avtaleteksten og forsøkt forhandla. Bjørnafjorden kommune må ha svar etter Samnanger kommunestyre sitt møte 14.09.2023 på om Samnanger er med på avtalen eller ikkje.

Samarbeidsavtalen med Bjørnafjorden vil vera heimla i kapittel 20 i kommunelova. Legevaktssamarbeidet vil vera eit administrativt vertskommunesamarbeid, med Bjørnafjorden som vertskommune og Samnanger som samarbeidskommune.

Legevaktordninga med Bjørnafjorden vil bli om lag som tidlegare, men med nokre endringar. Hovudendringa er at Samnanger i hovudsak vil tilhøyra legevakta i Eikelandssosen. Uttrykkingar på raud respons vil i hovudsak bli køyrt frå Eikelandssosen, dersom det ikkje er formålstjenlig å rykka ut frå Moberg/Os. Legevakta i Eikelandssosen vil ha ope nokre timar på kveld og helg (kjernetid), der ein får eit tidspunkt for å komma til Eikelandssosen. Dersom ein bur nærmare Os, skal ein få moglegheit for time på Moberg. Legevakttelefonen vil gå til Moberg uansett tidspunkt. Dette inneber at vurderinga av om ein skal komma til Os, eller i kjernetida Eikelandssosen, vil bli tatt under samtalen med legevakta. Dette inneber at konsultasjonar i kjernetida og raud respons i hovudsak vil bli ivareteke av legevakta i Eikelandssosen. Utanom kjernetida og raud respons er det Moberg som vil vera den fysiske legevakta.

Faktagrunnlag, problemskildring og moglege løysingar:

Alternativa som har blitt vurdert av administrasjonen:

1. Vurdera samarbeid med anna nærliggende kommune
2. Vurdera kjøp frå privat aktør
3. Ta legevakta tilbake til Samnanger kommune

Av kommunane som ligg i nærleiken til Samnanger har fleire kommunar ein form for samarbeid med andre kommunar, Kvam har samarbeid på natt – og som ein del av dette – legevakt på natt på Voss. Vaksdal har samarbeid med Voss på kveld og natt, med legevakt på Voss. Osterøy har samarbeid med Norhordlands kommunane og legevakt i Knarvik. Osterøy kommune har om lag 8150 innbyggjarar og betalar om lag 7,6 millionar for legevakt per 2023. Austrheim (som også har samarbeid med Knarvik) er litt større enn Samnanger og betalar i dag 3,7 millionar for legevaktssamarbeidet.

Samnanger kommune og Osterøy kommune har vore i forhandlingar med Bergen kommune om kjøp av legevaktteneste. Bergen kommune har gitt ulike svar i ulike møte på om dei er interessert i eit legevaktsamarbeid med Osterøy og Samnanger. Per dags dato ventar Samnanger på tilbakemelding som har latt venta på seg sidan fyrste kvartal i 2023.

Av større private aktørar kan ein mellom anna sjå for seg Volvat i Åsane. Dette er ei legeteneste som ikkje har ope på natt. Ser ein for seg at Samnanger skal vera einaste aktør, vil kostnaden for kommunen bli høg dersom Samnanger skal dekkja lege og helsepersonell ved ei slik legevaktordning.

Dei siste åra har det vore utfordringar med å skaffa fastlegar i heile landet, Samnanger har per i dag full legedekning. Legane som jobbar i Samnanger er tydelege på at auka vaktbelastning ved tilbakeføring av legevakt vil skapa misnøye og mogeleg utfordringar med arbeidsmiljøet. Ser ein for seg at ein skal leiga inn vikarlegar, kan ein få til ein «nordsjøturnus» slik dei har i Eikelandssosen. Vikarbyrå for legar annonserer med minstepris på 200 000 NOK i månaden. Dette vil bli ei særskild løysing då ein måtte hatt tre legar i ei slik ordning. Tilsetting av tre faste legestillingar i legevakt vil truleg bli utfordrande med tanke på utfordringar nasjonalt med å tilsetta legar. Skulle ein lykkast med å få tilsett tre legar i legevakt vil det vera realistisk å estimera ei lønnskostnadar på omlag 4 millionar for desse tre stillingane. Estimert lønnskostnad er utan hjelpepersonell og andre utgifter med å driva legevakt.

Vurderingar og konsekvensar:

Prisen for legevaktsamarbeid med Bjørnafjorden kommune var i 2022: 2 892 500 NOK

Ny pris etter finansieringsnøkkelen i ny avtale: 3 900 000 NOK.

Samnanger kommune har forsøkt å forhandla på prisen, men Bjørnafjorden kommune seier at det er denne finansieringsnøkkelen eller ingen avtale.

Vurderinga til rådmannen er at Samnanger i realiteten neppe har noko anna reelt val enn å inngå avtalen med Bjørnafjorden, på bakgrunn av at Samnanger elles vil stå utan legevakt på kveld, natt og helg frå hausten 2023. Samnanger kan sjå på andre alternativ, men fristen for signering av avtalen med Bjørnafjorden er så kort at ein ikkje har tid før denne avtalen må signerast.

Konklusjon:

Samnanger kommune sluttar seg til avtale om administrativt vertskommunesamarbeid mellom Bjørnafjorden kommune og Samnanger kommune om interkommunal legevakt og legevaktsentral.



SAKSFRAMLEGG

Sakshandsamar: Jan Erik Boge	Arkivkode: FE-223
Arkivsaksnr: 23/630	Løpenr: 23/7722
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	31.08.2023	054/2023
Kommunestyret		

Søknad om økonomisk støtte til N.K.S. Veiledningssenter Vest

Rådmannen sitt framlegg til vedtak:

Søknaden frå Norske Kvinners Sanitetsforening (N.K.S.) om økonomisk støtte til Veiledningssenter Vest blir ikkje innvilga.

Kommunestyret ber rådmannen leggja fram ei sak om retningslinjer for kommunal økonomisk støtte til landsdekkande eller regionale ideelle organisasjonar som tilbyr tenester som kan vera eit supplement til kommunen sitt tenestetilbod.

Dokument som er vedlagt:

Søknad om økonomisk støtte

Oppsummering:

Norske Kvinners Sanitetsforening (N.K.S.) har søkt Samnanger og andre kommunar i Vestland fylke om økonomisk støtte i 2023 og 2024, til N.K.S. Veiledningssenter Vest. Dette senteret er eit gratis lågterskeltilbod til pårørande til menneske med rusmiddellidingar og/eller psykiske vanskar.

Bakgrunnen for søknaden er at N.K.S. ikkje har fått statleg tilskot til Veiledningssentera sine i 2023, slik dei har fått tidlegare. Rådmannen tilrår ikkje at kommunen gir økonomisk støtte til senteret. Rådmannen foreslår at det blir utarbeidd retningslinjer for økonomisk støtte frå Samnanger kommune til landsdekkande eller regionale ideelle organisasjonar.

Saksopplysningar:

Bakgrunn for saka:

Norske Kvinners Sanitetsforening (N.K.S.) sende 31.05.2023 søknad til Samnanger og andre kommunar i Vestland fylke om økonomisk støtte til N.K.S. Veiledningssenter Vest. Søknaden gjeld økonomisk støtte både for 2023 og 2024. N.K.S. sine Veiledningssenter er eit gratis lågterskeltilbod for pårørande til menneske med rusmiddellidingar og/eller psykiske vanskar. Veiledningssentera kan òg bistå kommunene i pårørandearbeid. Bakgrunnen for søknaden er at sentera i 2023 har mista tilskotet frå staten som dei har fått tidlegare. N.K.S. skriv i søknaden at sentera no står i fare for å bli

nedlagde, og dei oppmodar kommunane til å bidra med økonomisk tilskot.

Faktagrunnlag, problemskildring og moglege løysingar:

N.K.S. er ein ideell, ikkje-kommersiell organisasjon. Dei har Veiledningssenter i fire regionar, fordelt på sju lokasjonar. Veiledningssenter Vest er lokalisert i Sandnes og Haugesund. Sidan 2004 har sentera vore delfinansierte av tilskotsordningar i Helsedirektoratet. På N.K.S. sine nettsider går det fram at denne støtta har vore på 10 – 12 millionar kroner årleg og utgjort om lag halvparten av finansieringa til sentera. N.K.S. opplyser på nettsidene sine at tilbodet deira er eit supplement, som ikkje dekkast av offentlege eller private aktørar.

Bakgrunnen for at sentera mista støtta i 2023, er at styresmaktene har gjort endringar på frivilligfeltet (gått vekk frå faste tilskot og over til søknadsbaserte tilskot). N.K.S. søkte om statleg tilskot på 15 millionar kroner for 2023, men fekk avslag.

Det er ikkje opplyst i søknaden frå N.K.S. kor stor økonomisk støtte dei søker kommunane i Vestland om. Samnanger kommune har ikkje gitt økonomisk støtte til N.K.S. Veiledningssenter tidlegare.

I ein [artikkel på N.K.S. sine nettsider publisert 14.06.2023](#) går det fram at det i revidert nasjonalbudsjett er løyvd meir midlar til frivillige organisasjonar, og at N.K.S. håpar å få noko av desse midlane. Det ser per d.d. (23.08.2023) ut til at det framleis ikkje er avklart om N.K.S. får noko av desse midlane.

Samnanger kommune har, så langt sakshandsamar har funne ut, ikkje nytta seg av tenester frå NKS Veiledningssenter. Kommunen har ikkje oversikt over om innbyggjarar i Samnanger vore i kontakt med eller motteke hjelp frå dei.

Kommunal økonomisk støtte til andre frivillige organisasjonar

Kommunen gir økonomisk støtte (tilskot) til ei rekke lokale lag og foreiningar i Samnanger, primært gjennom kulturmidlane. Dette gjeld mellom anna Samnanger Røde Kors, som fekk tilskot på 6 000 kroner i 2022 og 7 000 kroner i 2023.

Kommunen har også tradisjon for å gje økonomisk støtte ved NRK sin årlege TV-innsamlingsaksjon. I samband med dette gav kommunen i 2022 støtte på 7 000 kroner til Leger Uten Grenser.

Bortsett frå i samband med NRK sin årlege TV-innsamlingsaksjon, ser det ikkje ut til at kommunen har gitt økonomisk støtte til landsdekkande eller regionale frivillige organisasjonar innanfor området helse/omsorg/rus m.m. dei siste åra. Det ser heller ikkje ut til at mange slike organisasjonar har søkt kommunen om økonomisk støtte.

Vedtaksmynde

Vedtaksmynde i denne saka ligg, slik rådmannen vurderer det, til kommunestyret. Bakgrunnen for dette er at avgjerda i denne saka vil kunne få betydning for eventuelle framtidige tilsvarende saker.

Uttalar frå andre:

Det er ikkje henta inn uttalar frå andre i arbeidet med denne saka.

Vurderingar og konsekvensar:

Både N.K.S. og mange andre ideelle organisasjonar gjer mykje samfunnsnyttig arbeid. Dette er arbeid som mellom anna kjem kommunane til gode. Kven av desse organisasjonane som søker om tilskot frå kommunane, vil både variera og truleg også til ein viss grad vera tilfeldig.

Samnanger kommune har i dag ikkje ein overordna policy eller retningslinjer når det gjeld økonomisk støtte til frivillige og/eller ideelle organisasjonar, med unntak av for kulturmidlar til lag og foreiningar i Samnanger. Det kan som følge av dette vera utfordrande å vurdere søknader av den typen som kommunen no har fått frå N.K.S. Det bør vurderast om det er behov for å utarbeida

retningslinjer for eventuell økonomisk støtte til landsdekkende eller regionale ideelle organisasjoner.

Dersom landsdekkende organisasjoner som N.K.S. skal være avhengige av å få økonomisk støtte fra mange av landets kommuner, som alternativ til statlige tilskot som fell vekk, vil det samla sett bli mykje administrativt arbeid for kommunane. Det kan også være problematisk dersom kommunane skal «kompensere» når staten gjør endringer i kva typar frivillige tiltak og ordningar som skal få statleg økonomisk støtte. Det bør i utgangspunktet ikkje være eit kommunalt ansvar å finansiere tilbodet til landsdekkende ideelle organisasjoner.

For Samnanger kommune kan det truleg være mest aktuelt å vurdere å gi økonomisk støtte til ideelle organisasjoner som held til i nærområdet (distriktet) vårt. N.K.S. Veiledningssenter Vest er lokalisert i Sandnes og Haugesund. Sjølv om innbyggjarar i Samnanger kan ta kontakt med senteret på både telefon og via internett, ville det truleg vere enklare for innbyggjarane våre å bruke senteret dersom det var lokalisert nærmare oss, for eksempel i Bergen.

Dersom Samnanger kommune skal gi økonomisk tilskot til N.K.S. Veiledningssenter, kan det være naturleg at storleiken på tilskotet blir basert på kor stort folketalet i Samnanger er i forhold til det samla folketalet i Noreg. Dersom N.K.S. i 2023 har behov for 15 millionar kroner i tilskot til saman frå alle kommunane i landet – og me tek utgangspunkt i at folketalet i Samnanger (om lag 2 500 personar) utgjer om lag 0,5 promille av det samla folketalet i Noreg – vil dette tilseie eit tilskot frå Samnanger på om lag 7 500 kroner.

Som det går fram ovanfor i dette dokumentet, vart det i revidert nasjonalbudsjett 2023 løyvd meir midlar til frivillige organisasjoner. N.K.S. håpar å få noko av desse midlane. Dersom dette skjer, vil truleg behovet for kommunal økonomisk støtte bli tilsvarande mindre.

Konklusjon:

På bakgrunn av kva som er og har vore praksis i kommunen, tilrår rådmannen at Samnanger kommune ikkje gir økonomisk støtte til N.K.S. Veiledningssenter Vest.

For å forenkla handsaminga av eventuelle liknande saker i framtida, foreslår rådmannen at det blir utarbeidd retningslinjer for kommunal økonomisk støtte til landsdekkende eller regionale ideelle organisasjoner som tilbyr tenester som kan være eit supplement til kommunen sitt tenestetilbod.



SAKSFRAMLEGG

Sakshandsamar: Jan Erik Boge	Arkivkode: FE-026, FA-C20
Arkivsaksnr: 19/303	Løpenr: 23/7333
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	31.08.2023	055/2023
Kommunestyret		

Tilslutning av nye deltakarkommunar til Bergen og Omland Friluftsråd

Rådmannen sitt framlegg til vedtak:

Kommunestyret i Samnanger kommune gir med dette si tilslutning til at kommunane Fedje, Gulen, Masfjorden og Modalen blir nye deltakarar i Bergen og Omland Friluftsråd Kommunale Oppgavefellesskap med verknad frå 01.01.2024. Dei nye deltakarkommunane sitt ansvar og forpliktingar følgjer av samarbeidsavtalen og lov om kommunar og fylkeskommunar (LOV-2018-06-22-83) frå 01.01.2020 «kommuneloven»).

Dokument som er vedlagt:

Saksutgreiing frå administrasjonen i BOF
Samarbeidsavtale mellom deltagerkommunene og Bergen og Omland Friluftsråd
Forslag til ny samarbeidsavtale Bergen og Omland Friluftsråd

Dokument som ikkje er vedlagt:

- Lov om kommunar og fylkeskommunar (kommunelova)
(<https://lovdata.no/dokument/NL/lov/2018-06-22-83>)

Oppsummering:

Samnanger er ein av 12 deltakarkommunar i Bergen og Omland Friluftsråd Kommunale Oppgavefellesskap (BOF). Fire nye kommunar (Fedje, Gulen, Masfjorden og Modalen) har no søkt om å bli med i BOF. Både administrasjonen, styret og representantskapet i BOF anbefaler at desse fire kommunane får bli med i BOF. Tilslutning for nye deltakarkommunar i BOF må godkjennast av kommunestyret i alle dei noverande deltakarkommunane, mellom anna Samnanger.

Saksopplysningar:

Bakgrunn for saka:

Samnanger er i dag ein av 12 deltakarkommunar i det kommunale oppgåvefellesskapet Bergen og Omland Friluftsråd. Dette oppgåvefellesskapet er oppretta med heimel i kapittel 19 i kommunelova. Dei andre deltakarkommunane er Alver, Askøy, Austevoll, Austrheim, Bergen, Bjørnafjorden, Kvam, Osterøy, Tysnes, Vaksdal og Øygarden. Fire nye kommunar har no søkt om å bli deltakarkommunar i BOF. Dette gjeld Fedje, Gulen, Masfjorden og Modalen. Både administrasjonen, styret og representantskapet i BOF anbefalar at desse fire kommunane får bli med i BOF, med verknad frå 01.01.2024. Etter samarbeidsavtalen for BOF, må tilslutning for nye deltakarkommunar godkjennast av kommunestyra i alle deltakarkommunane. Saka blir derfor no lagt fram for Samnanger kommunestyre.

Faktagrunnlag, problemskildring og moglege løysingar:

Nedanfor følgjer ein kort gjennomgang av saka. For meir utfyllande informasjon blir det vist til den vedlagte saksutgreiinga som administrasjonen i BOF har utarbeidd. Vedlagt følgjer òg kopi av den noverande samarbeidsavtalen for BOF, samt forslag til ny samarbeidsavtale.

BOF er inndelt i fem regionar:

- Nord: Alver, Austrheim
- Sør: Austevoll, Bjørnafjorden, Tysnes
- Øst: Kvam, Osterøy, Samnanger, Vaksdal
- Vest: Askøy, Bergen
- Bergen: Bergen

I framlegget til ny samarbeidsavtale blir det foreslått at alle dei fire nye deltakarkommunane (Fedje, Gulen, Masfjorden og Modalen) blir innplasserte i region Nord.

Befolkningsgrunnlaget i dei 12 noverande deltakarkommunane i BOF var pr. 30.09.2022 på 447 499 innbyggjarar. Dei fire nye søkjarkommunane hadde på same tidspunkt totalt 4 758 innbyggjarar. Nedanfor følgjer ein tabell som administrasjonen i BOF har utarbeidd, og som viser kva endringar det vil bli i eigarbrøkar m.m. dersom dei fire søkjarkommunane blir med i BOF.

Kommune	Folketall 30.09.2022	Prosentvis fordeling	Eierbrøk pr 01.01.2021	Eierbrøk pr 01.01.2024	Eierbrøk endring
Alver	29 835	6,7 %	6,6 %	6,6 %	0,0 %
Askøy	29 952	6,7 %	6,7 %	6,6 %	-0,1 %
Austevoll	5 313	1,2 %	1,2 %	1,2 %	0,0 %
Austrheim	2 858	0,6 %	0,6 %	0,6 %	0,0 %
Bergen	288 841	64,5 %	64,6 %	63,9 %	-0,7 %
Bjørnafjorden	25 494	5,7 %	5,7 %	5,6 %	-0,1 %
Tysnes	2 915	0,7 %	0,7 %	0,6 %	-0,1 %
Øygarden	39 280	8,8 %	8,7 %	8,7 %	0,0 %
Samnanger	2 506	0,6 %	0,6 %	0,6 %	0,0 %
Vaksdal	3 878	0,9 %	0,9 %	0,9 %	0,0 %
Kvam	8 496	1,9 %	1,9 %	1,9 %	0,0 %
Osterøy	8 131	1,8 %	1,8 %	1,8 %	0,0 %
Fedje	505			0,1 %	0,1 %
Gulen	2 236			0,5 %	0,5 %
Masfjorden	1 644			0,4 %	0,4 %
Modalen	373			0,1 %	0,1 %
Sum	452 257	100,0 %	100,0 %	100,0 %	0,0 %

Det blir ikkje foreslått å gjera endringar i talet på styremedlemmer som følgje av at oppgåvefellesskapet blir utvida med fire nye kommunar. Representantskapet, der alle kommunane

har éin representant, vil bli utvida med fire representantar (èin frå kvar av dei fire nye kommunane).

Arealet til dei noverande 12 deltakarkommunane i BOF er til saman om lag 4 350 kvadratkilometer, medan arealet til dei fire søkjarkommunane til saman er om lag 1 575 kvadratkilometer. Dette betyr at det samla arealet til deltakarkommunane i BOF vil auka med om lag 36 prosent dersom Gulen, Fedje, Masfjorden og Modalen blir nye deltakarkommunar.

Samnanger kommune betalar årleg om lag 60 000 kroner i kontingent til BOF. Det er ikkje noko som tilseier at denne kontingenten vil auka dersom dei fire søkjarkommunane blir nye deltakarkommunar i BOF.

I saksutgreiinga som administrasjonen i BOF har utarbeidd, er det gjort greie for utfordringar og kapasitet til å ta på seg oppgåver for fire nye medlemskommunar, og kva oppgåver administrasjonen ser for seg å kunne yta for desse kommunane. Det er også gjort greie for korleis opptak av nye kommunar vil koma dei noverande deltakarkommunane til gode. Administrasjonen i BOF er trygg på at opptak av nye kommunar ikkje skal gå på bekostning av servicenivået til dei noverande deltakarkommunane.

Uttalar frå andre:

Det er ikkje henta inn uttalar frå andre i arbeidet med denne saka.

Vurderingar og konsekvensar:

Vurderingar:

På bakgrunn av informasjonen i saksutgreiinga frå administrasjonen i BOF, er rådmannen si vurdering at Samnanger kommune bør gje tilslutning til at Fedje, Gulen, Masfjorden og Modalen blir nye deltakarkommunar i BOF. Det kjem ikkje fram noko i saksutgreiinga som gjer at Samnanger kommune ikkje bør gje slik tilslutning.

Det samla arealet til medlemskommunane vil auka relativt mykje dersom dei fire kommunane blir med i BOF, men rådmannen oppfattar det slik at dette ikkje er noko stor bekymring verken for administrasjonen, styret eller representantskapet i BOF.

Konsekvensar:

Det ligg ikkje føre informasjon som tyder på at det vil få negative konsekvensar for Samnanger dersom Fedje, Gulen, Masfjorden og Modalen blir nye deltakarkommunar i BOF. Dette gjeld både økonomiske og andre konsekvensar. Det kan likevel ikkje utelukkast at å få fire nye kommunar med i samarbeidet, i enkelte tilfelle kan gjera at administrasjonen i BOF vil få mindre kapasitet til å ivareta dei noverande samarbeidskommunane.

Konklusjon:

Rådmannen tilrår at Samnanger kommunestyre gir tilslutning til at Fedje, Gulen, Masfjorden og Modalen blir nye deltakarar i Bergen og Omland Friluftsråd Kommunale Oppgavefellesskap med verknad frå 01.01.2024.



SAKSFRAMLEGG

Sakshandsamar: Jan Erik Boge	Arkivkode: FE-233, FA-D1
Arkivsaksnr: 21/789	Løpenr: 23/8313
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	31.08.2023	056/2023

Søknad frå Lønnebakken Grendelag om ekstra midlar til asfaltering av multibane

Rådmannen sitt framlegg til vedtak:

Søknaden frå Lønnebakken Grendelag om tilskot på 15 000 kroner til å dekkja uføresette utgifter til asfaltering av multibane ved Lønnebakken aktivitetsplass, blir innvilga.

Tilskotet blir finansiert med midlar frå fondet «Lavterskel aktivitet for born og unge».

Dokument som er vedlagt:

Søknad ekstra midler til asfaltering

Saksopplysningar:

Bakgrunn for saka:

Lønnebakken Grendelag v/leiar Evelyn Frøland sende 20.08.2023 søknad til Samnanger kommune om 15 000 kroner til dekking av uføresette ekstra utgifter til asfaltering av multibane på Lønnebakken. Rådmannen ser det som naturleg at søknaden blir handsama av politisk nivå i kommunen.

Faktagrunnlag, problemskildring og moglege løysingar:

Lønnebakken Grendelag fekk i 2022 tilsegn om økonomisk tilskot på til saman om lag 600 000 kroner til etablering av aktivitetsanlegg (multibane), heilt øvst i det kommunale bustadfeltet på Lønnebakken. Av summen på 600 000 kroner utgjør tilskot frå fylkeskommunen 476 000 kroner, tilskot frå Sparebanken Vest 100 000 kroner og tilskot frå Samnanger kommune om lag 22 000 kroner. Desse midlane skulle dekkja utviding av grusbane, nye murar og gjerde, lys, asfaltering og sportsdekke. Arbeidet hadde oppstart i september 2022 og det meste av arbeidet vart utført i løpet av hausten 2022. Mykje av arbeidet vart gjort på dugnad. Asfaltering av multibanen er enno ikkje gjort. På grunn av nødvendig skifte av leverandør vil kostnaden for asfaltering bli om lag 25 000 kroner høgare enn budsjettert. Det er ikkje teke høgde for ein så stor ekstrakostnad i prosjektbudsjettet, og Lønnebakken Grendelag søker om at kommunen dekkar 15 000 kroner av denne ekstrakostanden.



Bilde frå Lønnebakken.

Spelemlane på 476 000 kroner til prosjektet gjeld tilskot til anlegg for idrett og fysisk aktivitet (Lønnebakken aktivitetsplass). Anlegget vil mellom anna kunne brukast til tennis, basketball, handball, fotball, slåball og volleyball.

Tilskotet frå Samnanger kommune på om lag 22 000 kroner som allereie er løyvd, vart gitt etter administrativt vedtak i 2022. Dette tilskotet vart gitt på bakgrunn av at prosjektet vil vera svært positivt som nærmiljøanlegg, både for bustadfelta i området og for barneskulen.

Det går fram av søknaden at Lønnebakken Grendelag ikkje har budsjettmidlar til å dekkja ekstrakostnadene på 25 000 kroner til asfaltering. Ifølgje søknaden vil budsjettet gå 10 000 kroner i minus dersom denne kostnaden skal betalast, og det vil då heller ikkje vera nokon buffer til uføresette utgifter. Dersom kommunen innvilgar søknaden om støtte på 15 000 kroner, vil det vera ein buffer på om lag 10 000 kroner til uføresette utgifter.

Det går ikkje fram av søknaden om Lønnebakken Grendelag også har teke kontakt med andre enn Samnanger kommune om ekstra økonomisk støtte til asfaltering. Rådmannen tek utgangspunkt i at det berre er kommunen som har fått ein slik søknad.

Kommunen tildeler kvart år kulturmidlar til lag og organisasjonar i Samnanger. Søknadsfristen for ordinære kulturmidlar er 20. mars. Kulturmidlane for 2023 er allereie fordelte/tildelte, og det er ikkje ytterlegare slike midlar tilgjengeleg i år.

Det er per i dag heller ikkje tilgjengeleg andre kommunale driftsmidlar som er disponert til denne typen formål, men det kan vera mogleg å bruka av unytta tilskotsmidlar på 25 000 kroner som kommunen i 2018 fekk frå fylkeskommunen. Dette tilskotet vart gitt til ein medverknadsprosess for å gjera uteområdet på ungdomsskulen attraktivt. Medverknadsprosessen vart gjennomført, men midlane vart ikkje brukt. Fylkeskommunen informerte i 2019 om at kommunen kunne behalda desse midlane, og midlane er sette av på eit kommunalt fond som heiter «Lavterskel aktivitet for born og unge». Det er ikkje fastsett vedtekter for dette fondet.

Uttalar frå andre:

Det er ikkje henta inn uttalar frå andre i arbeidet med denne saka.

Vurderingar og konsekvensar:

Generelt er det viktig at kommunen har ein praksis med open og mest mogleg rettferdig fordeling av

tilskotsmidlar til lag og organisasjonar. Dette er gjerne formalisert gjennom tilskotsordningar som blir kunngjort med søknadsfristar, for eksempel kulturmidlane. Kommunen må uansett også vurdere søknader som kjem inn utanfor desse søknadsfristane.

Prosjektet som Lønnebakken Grendelag no søker om tilleggsstøtte til, er positivt både for nærområdet og andre som ønskjer å bruka aktivitetsplassen. Frå kommunen si side er det viktig å leggja til rette for denne typen anlegg/møteplassar. Det vil vera svært synd dersom prosjektet ikkje kan fullførast med asfaltering av banen. Det er ein relativt liten ekstra støttesum (15 000 kroner) som skal til for å få fullført prosjektet. Rådmannen si vurdering er at kommunen bør bidra til at prosjektet kan fullførast, gjennom å gje ekstra økonomisk støtte til asfaltering.

Eit ekstra kommunalt tilskot på 15 000 kroner til asfaltering av multibanen på Lønnebakken vil kunne finansierast med midlar frå kommunen disposisjonsfond.

Eit anna alternativ kan vera å bruka midlar frå fondet «Lavterskel aktivitet for born og unge». Midlane på dette fondet vart som nemnt ovanfor opprinneleg løyvd til uteområdet ved ungdomsskulen. Det er framleis behov for midlar til uteområdet ved ungdomsskulen, men det er per i dag ikkje konkrete planar om å bruka midlar frå fondet. Det vil vera opp til kommunen å avgjera kvar midlane frå fondet skal brukast, men det er ein føresetnad at midlane blir brukte til aktivitetsanlegg for barn og unge. Rådmannen si vurdering er at midlar frå dette fondet kan brukast til aktivitetsplassen på Lønnebakken.

Rådmannen ser det som naturleg at søknaden blir handsama av politisk nivå i kommunen. Rådmannen si vurdering at kommunestyret bør gjera endeleg vedtak i saka.

Konklusjon:

Rådmannen tilrår at kommunen innvilgar søknaden frå Lønnebakken Grendelag om ekstra støtte på 15 000 kroner til asfaltering av multibane. Tilskotet bør finansierast med midlar frå fondet «Lavterskel aktivitet for born og unge».



SAKSFRAMLEGG

Sakshandsamar: Jan Erik Boge	Arkivkode: FE-140
Arkivsaksnr: 22/300	Løpenr: 23/8383
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Formannskapet	31.08.2023	057/2023

Offentleg ettersyn av detaljregulering for Aldalen akvakulturanlegg i Lønningdal

Rådmannen sitt framlegg til vedtak:

Saka blir lagt fram utan tilråding frå rådmannen.

Dokument som er vedlagt:

Saksutgreiing Bjørnafjorden kommune

Saksprotokoll Bjørnafjorden kommune 21.06.2023 – Plan-, bygg- og miljøutvalet

Plankart

Planomtale

Reguleringsføresegner

Dokument som ikkje er vedlagt:

- Delegeringsreglement for Samnanger kommune
(<https://www.samnanger.kommune.no/siteassets/reglement-og-vedtekter/delegeringsreglement/delegeringsreglement-ajourfort-19.12.2021.pdf>)

Oppsummering:

Bjørnafjorden kommune la i juni 2023 detaljreguleringsplan for Aldalen akvakulturanlegg i Lønningdal ut til offentlig ettersyn, med merknadsfrist 04.09.2023. Samnanger kommune kan gje merknader i saka. Saka blir no lagt fram for formannskapet for handsaming.

Saksopplysningar:

Planarbeidet starta som følgje av planlagt ny straumkabel ut Samnangerfjorden for elektrifisering av to anlegg i Nordsjøen. Grunna ny kabel i sjø, må ankerfesta til eksisterande oppdrettsanlegg i området flyttast og endrast geografisk. Når ankerfeste og fortøying først må flyttast ønskjer tiltakshavar å oppdatera anlegget slik at det oppfyller dagens krav.

Plandokumenta er lagt ut på Bjørnafjorden kommune sine nettsider, på følgende lenke:

- <https://bjornafjorden.kommune.no/sok-etter-sak/filter-kunngjeringar/offentleg-ettersyn-av-detaljregulering-for-aldalen-akvakulturanlegg.36778.aspx>

Følgjande saksdokument følgjer som vedlegg til denne saksutgreiinga:

- Bjørnafjorden kommune si saksutgreiing
- Saksprotokoll Bjørnafjorden kommunen sitt plan-, bygg og miljøutval 21.06.2023
- Plankart
- Planføresegner
- Planomtale

Resten av dokumenta i saka kan lastast ned ved å gå inn på lenka i avsnittet ovanfor.

Saka blir lagt fram for handsaming i formannskapet utan tilråding frå rådmannen. Av kapasitetsmessige årsaker har administrasjonen i Samnanger kommune heller ikkje utgreidd denne saka, men etter avtale med ordføraren blir saka likevel lagt fram for handsaming i formannskapet. Det vert vist til Bjørnafjorden kommunen sine saksdokument for detaljert informasjon om saka.

Det går fram av punkt 6.2.h i Samnanger kommune sitt delegeringsreglement at formannskapet har fullmakt til å gje høyringsuttale i saker som blir vurdert å ha politisk interesse og som ligg innanfor formannskapet sitt ansvars- og arbeidsområde. Denne fullmakta gjeld ikkje saker av slik karakter at det er kommunestyret som skal gje uttale (prinsipielle saker m.m), men formannskapet har på visse vilkår også fullmakt til å gje uttale i saker som normalt skulle vore handsama av kommunestyret. Jf. punkt 4.3 i delegeringsreglementet.